

六一山房詩集

六一山房續集卷六

己卯

鄆 董 沛 覺軒

己卯

元日

元化轉初籥魁柄司東皇戶戶春帖新語語多吉祥自
笑五十公度歲恆家鄉今年始爲客已嘆鬚鬢蒼望空
稽首拜遠以恭梓桑寄我一寸心道路殊阻長遊蹤隔
千里親故榮迴腸願言酌春酒蘄爾樂且康

二

明發趨節轅天陰風力猛蔽體雖重裘猶覺一身冷輿

朱子集卷之十六
夫肩我行健足苦泥濘努力爭道馳前擁後難騁垂老
學作吏消磨舊鋒穎僵僵謁長官高下亦區區出郭行
益遲江梅弄枯影似笑風塵勞凌寒守孤靜

三

望門各投刺不復見主人廬舍亦閉戶團坐皆閒身喜
見道旁子一例衣冠新相逢半相揖長幼何莘莘萬寓
同覆載和樂見性眞皇古揖讓風斯理未盡泯頗嫌微
雨來躑躅殊苦辛一灑天下徧想亦王澤醇

二日大雪同張公東馮恩江

永年兩明府飲李秀

峯廣文寓園

同雲沈沈一天幕千樹萬樹琪花落故人難黍踐宿約
要我衝寒共一杯酌興夫僵凍雙赤腳亂踏湖隄過橫衍
入門相見驚瘦削道病初痊尙需藥焚香燒炭火融爚
主客圍爐大歡噱虛室空明護簾箔窗格流黎塵不著
嵌空奇石兩峯岑枯枝槎枒孕梅萼招邀且復上高閣
天宇森森勢寥廓寒氣一散不可縛高舞玉龍低素鶴
去年東湖水乾涸湖底爛銀白矇矇城南孤塔警鈴鐸
晚色昏黃餓鷹掠張燈開筵暢談謔海錯山肴供咀嚼
狐裘瑟縮北風惡汾酒猶嫌酒力薄我輩微官此落拓
隱與民生繫歌罷陽春主宰萬物橐橐六消除旱魃虐

東疇告成西疇穫賜酺豐年大家樂

題李秀峯匡廬讀書圖

匡山讀書處供奉留高臺一瞬千百年待子翩然來僧
房蔭叢樹樵徑封蒼苔埽彼舊塵迹披豁煙雲開置身
最高巔下視皆氛埃長江繞几榻鄱湖浮如杯繙經笑
佛侶把卷思仙才吾將從子游攜手相徘徊

人日以鄉味佐飲

姜嶼標風物江鮮寄最難遠從千里路來佐一家餐對
酒添鄉思封冰趁歲寒且須佳客至新樣薦春盤

春感

料檢南州舊史編章門旅食已經年曇曠曉日官衙鼓
迢遞晴江客路船杜老閒吟惟愛國杞人寂處每憂天
茫茫身世無窮感寫入春愁更邈緜

二

燕趙高區舊苦寒河東移粟轉艱難妖驛甫解黃天厄
慘象偏逢赤土乾井里蕭條民氣索租庸蠲卹
帝恩寬鄰封又報宣房決沁水橫流勢浩漫

三

岷江直下海門來吳楚聯疆亦歲災深谷變遷蛟蜃起
危林棲宿雁鴻哀循良誰溯冀黃傳補救難言鄭白才

樊口一隄爭利病

詔書諄切尙徘徊

四

交州飛羽警郵傳旌旆逍遙救不前萬里投荒秦謫戍
一軍下瀨漢開邊願平林邑師宗慤忍罷珠崖議賈捐
區畫得中非易易滿枰棋著要爭先

五

玉關馳馬草蘇蘇狼蠭花門種類殊回紇舊通西突厥
康居新置北單于將軍鄭重天山箭使者經遊地海圖
無恙金甌留缺處窮邊落日奈桑榆

六

皇華一例渡重瀛博望乘槎鑿空行

聖代原非矜遠略友邦應共洽歡盟估帆競卜回圖利
機器能窮格致精猶道金山傭作苦好從諸島護流氓

七

鄉關東去接扶桑驕抗元明勢漸強察罕輿封籌郡縣
全羅邊塞達舟航空傳邢宋紓鄰難尙冀譚俞固海防
自昔明州原貢道雲山回首益神傷

八

上元甲籤

中興初休養年年力未舒漢律已刪輸粟令周藩應補
救荒書列屯芻饑軍儲亟敦俗農桑本計疏堪笑卑官
無建白祇憑圖籍課盈虛

送楨姪東歸

去歲從我來今歲別我歸殷勤事大母大母年古稀

二

江風去何急江月猶徘徊今歲送汝歸明歲期汝來

題鄭伯庸司馬由熙重到金陵圖

東帆一舟重過石頭江樹枯色嗚咽水流泊舟短亭重
入臺城蓬蒿匝地但聞鬼聲臨風浩歎重登蔣山衝衢

列隊諸軍守關拂衣自回重訪秦淮吳宮麋鹿傷心館
娃蒼茫四顧杳不知路悠悠我思云誰告語脫身而出
重覩天日老親思家稽首禮佛兵戈亂離重見漢儀我
來自西云胡不歸

再題蓮漪填詞圖

藕花時節晚涼天鏡裏鬚眉畫裏船無限大江東去意
不須低唱柳屯田

過城南鄧氏園

出郭二三里居然野客園茶香人語淡果熟鳥聲喧高
樹齊遙塔平山護短垣何當圖笠屐主人一
鬚者相對欲忘

清泰寺雙松歌

慈仁雙松真絕奇我昔過之無一詩古人名作已林立
紛紛塗抹將何爲爾來捧檄豫章郡窮巷狹隘卑官棲
每思攬勝出郊野吐納雲水澄鬚眉城南老僧昨有約
招我到寺毋需遲入門一笑忽驚愕當庭矗立雙蛟螭
喬柯參天逾百尺苔蘚剝蝕生皴皮濃青潑翠競圖寫
宛若寶蓋華旛垂蟠根想在九泉下茯神化兔深不知
時聞空中雜梵唄法雨灑幹風搖枝天龍欲臥竟不臥
出世遠溯嘉隆時星霜閱歷四百載猶見古貌寒勁姿

岳王老檜徒寄恨蜀相古柏空留題爾雖偃蹇尚有偶
從爾呼嘯章江湄章江舊日邁兵燹頽冠大合嚴城圍
琳宮梵宇半焦土爾幸不作柴薪炊想以寂寞葆真性
宏慧願力交護持靈山祇樹自千古爾亦蔭戴諸佛慈
愧我風塵走俗狀燕關五度雙輪馳樗材聊可中棖桷
宋廟棟柱非所宜文章小道儻不朽借爾煙墨書我辭
惟爾有神亦知我沈賦謝贊今其誰

贈李芋仙刺史

士棻

大江千里下夔州一束關門勢逆流洗出故侯奇骨相
醉揮詩筆當吳鉤

濫吐車茵處世難湖濱風月獨清寒年來兀向蒲團坐
應把冤親平等看

唐貞女詩

生於唐字於湯女未嫁郎已亡女年十六郎十五郎僅
中殤女悲苦自少能讀中壘書未必今人不如古閉關
絕粒餘息存聞郎之訃誓殉身父母勸兒兒不死不死
願入湯家門言告舅姑迎之同居草草婚禮終身不渝
孤峯不渝碧良玉不渝白生離湘水魂唐籍死作金陵
魄金陵世家自光耀王舅死忠王姑孝第一門風孫婦

肖

題寓齋壁

遙指西山到未能近觀流水意澄澄磯苔著雨痕都長
檜樹支風力不勝畫倦懶貓橫據榻夜深飢鼠暗窺燈
游神且作華胥想夢入瑤臺第幾層

羅兩峯瀟湘畫卷爲王鵠樵觀察

嵩齡題

吾家北苑瀟湘圖輞川之王嘉陵吳宣和祕藏此遺冊
蓬心太守曾臨摹後來覃谿得此卷門下周生同展玩
拍案大叫稱絕奇道彼生平夢遊慣重臨乃屬羅兩峯
平山一帶青蔥蘿漁樵僧侶都入畫飄然鞅襪煙波中

昔聞兩峯善畫鬼譎怪離奇古無比別出手眼寫此圖
真境湘南好山水乾嘉諸老有題句行草兼書託毫素
一二作手詩可傳餘子姓名類相坴遙遙古本千星霜
三綴跋語惟香光臨本到今亦百載乃遇識者珍收藏
瑤瑤世望青箱學金石編摩已成錄購求書畫名蹟多
此卷殊能豁人目洪都西接潭衡州瀟湘不隔鄱湖流
高堂挂壁憶王宰盛夏對坐吾覺秋物各有知投所好
鄭重標題爲世寶可憐古本歸靈巖九十萬卷同一埽
吁嗟乎北苑之畫香光書吾家才彥今不如瀛壺東望
先人廬我無此筆空躊躇

甯府雜詩

第一雄藩北會州六千車乘古諸侯如何負卻鴻溝約
南放江湖帝子洲

二

韜晦深宮五十年洞天清課署曜仙淮南本有非常志
垂老皈依道德篇

三

大本堂開嫡長尊嗣皇行遯入空門天教草檄勳藩裔
茅土承家亦世孫

四

抹額紅羅錦臂韁樂工承應本俳優膠庠齊祝瑯琊疏

不選儒生選羽流

王府樂舞舊選諸生王尙書來爲新建教諭時奏革之

五

悼惠分封國已除故妃同命有誰書甘心願比朝天女

特謚新頒正統初

悼惠王盤煤封信豐無子國除妃劉氏絕粒以殉特謚貞烈明史未書

六

行樂宮闈事可疑露章偏怪守臣知依然漢代江都傳

十輩承恩首淖姬

七

樓窗面面納湖波插架圖書萬卷羅別採菁華登部目

揀金揆玉不須多

靖王構湖樓藏書甚富弋陽恭懿王曾刊甯藩書目一卷

八

祕廬青瑣夜沈沈手著仙謠卻埽吟任說陳王才調好
魏家禁令總傷心

靖王有才藻著仙謠卻埽吟擬古詩二百餘篇

九

同室操戈掩蔽難可憐奇禍伏無端龍雷催送西山雨
不洗丹陽路后冤

十

絕代風流貴主家翩翩下降肅雔車儀賓唱和都成集

一種詩篇寫桂華

靖王女安福郡主下降孔景文夫婦並工詩主尤善書筆法遒勁著桂華

十一

勳貴妻孥入教坊先朝弊政此遺殃君看玉葉天家種
生自邯鄲挾瑟倡

宸濠母
馮氏

十二

校尉籠鎧百騎驅繡鞍金勒綴明珠秦宮新荷君王寵
一例臧賢炫北都

伶人秦榮爲宸濠
所嬖烜赫如王者

十三

天子頻年幸豹房帝星江漢有祥光白洲未曉真人起
妄指休徵屬豫章

江漢帝星應在世宗李士實誤屬甯
藩范氏天一閣有白洲集改其名爲

賓士

十四

朱邸潭潭燕席開
內家傳召大官陪
千年埋碧無從訴
斷送英魂酒一杯

巡撫董傑參將趙鍼俱爲宸濠毒死明史甯王傳未書

十五

衛鶴乘軒此帶牌
荒王自古有同儕
先幾早被陳妃覺
豈獨癡人冀闇齋

樂安靖莊王妃陳氏預知宸濠逆謀命其子遠之故端簡王拱櫂得免難

十六

異色龍牋御寶封
羣官入賀禮雍容
司香果遂承祧願
幾見明堂享睿宗

十七

迢迢天竺飯僧徒絡繹錢江內使符猶得昌黎驅
手肯教烽火到西湖宸濠將襲浙使內官飯僧天竺寺衆者數千人韓恭簡邦奇方僉浙臬立解散之

十八

僞檄分馳順德年蔽江千里下樓船平南若待親征旅
早占留都一著先宸濠以正德十四年六月改元順德

十九

破卵焚巢勢已孤熏天虐餒霎時無青衣躡躅江南道
休望銀盆洗手污宸濠就逮監者以銅盆供洗手猶怒曰獨無銀盆耶

二十

同牀各夢兩情分借諷田家置不聞羞與趙妃同禁錮
月明湖水弔湘君

元妃婁氏以耕樵詞諫王卒不悟既敗投水死次妃趙氏免死禁高牆嘉靖中男子朱學自言宸濠第三子趙出也從舅氏亡命欲詣高牆見母詔驗實同禁錮

二十一

忠良坊表聖書旌統攝藩支舊有名三疏請修先代祀
可知東樂卽東平

弋陽端惠王拱檳折節讀書行誼表表甯國除統攝府事勅建忠良顯德坊著有東樂軒稿

二十二

詞客經師兩異才芙蓉園對枳園開一門子弟王風盛

多少名流接踵來

芙蓉園奉國將軍多煃所築能詩與王李倡和枳園鎮國中尉謀塢所築

著書百餘種甯支多文人略見於明史諸王傳此外如拱樞多焜謀教謀圭謀塢統鑄統鉉並有著作

二十三

捐祿輸糧助學宮瞻依慈寢樂融融藥鑪酒甕都神異

不見諸王史傳中

奉國將軍拱折捐祿代濱湖災民輸課鎮國中尉多煃多博買田助南昌

學弋陽王多焜事嫡母歐陽妃以孝稱輔國中尉多煃父病禱天請代既昏喘剗股投藥鑪和之以進遂復甦奉國將軍拱柂亦刲股愈母疾居喪盡禮酒甕產瑞芝史皆不書

二十四

舊事摩挲四百春西山遺冢半頽壇詩人惟表婁妃墓

曲部登歌樂府新

獻王墓在新建綠嶺惠王墓在遐齡峯靖王墓在煙溪康王墓在潤溪惟

費妃墓在德勝門外乾隆中大吏修之
蔣心餘以樂府紀其事同治中重修

八月六日入省闈作

朝旭開晴爽高秋八月天使星來駐節齋日例停筵廣
座衣冠肅前驅甲仗鮮飛輿湖上路夾道盡摩肩

九日同林粲英刺史

嵩堯
話舊

隸名博士籍廿載頗有餘屢踏錢塘門我舟君亦車前
度屆卯科聯袂登鄉書此日當此時矮屋聲咷唔差信
命中技魯薛爭投壺吳質及徐幹意興良不殊典試吳
修樹梅舉京兆同事徐雲階
司馬允升舉中州並丁卯
雙臣編顯晦有定分茵溷隨所趨
一星忽已終奔走來江湖裏校文字役濫數王門等吾

郡得二人聊解心緒孤商聲厲秋葉風雨淒庭除對夢
非聯牀亦復兄弟如揚船網赤珊瑚探穴接驪珠君我滄
海客努力相提拔

十三夜月

偶作還家夢殷闌社火新故鄉今夜月歲歲照遊人

十六夜月

虛窗澄澈一輪孤鑑取冰心在玉壺猶記青袍江上客
九番邀汝醉西湖

魁雞行

大可一握形如拳重六七兩猶秦權抱卵計在三月前

距無堅甲頭無冠五日一進充食單名之以魁殊可憐
爾質渺小爾命寃彌彌向我聲悲酸呼僕解索姑養旃
不時不食先聖言公餧日雙例亦刪菜根咀嚼吾其安
任爾飲啄行立眠活潑潑地優游天羽毛豐滿當改觀
昂首舒翮文斑爛山陰換鵝道士慳建業饋鴨軍人歡
爾鷄一鳴能度關魁爾羣輩功爛然毋使爾佐林宗餐
長生沖舉淮南仙

闡中卽事

兩行官舍坐聯翩校藝分曹彩筆鮮敢說升沈關福命
要憑文字結因緣諸君自奮扶搖路我輩曾開翟繅筵

之二十一

欲向五星明處望乘風先到蔚藍天

二

庭院霜多暑氣閑倚燈兀坐覺衣單廿年辛苦青衫在
五夜研摩赤字難藜火校書天祿迴桂香沾袂月華寒
紛紛戰士銜枚勇願與平南善見觀

三

西江清派有遺音霧裏看花著意尋一擲得盧誰出手
千金買駿幾同心空中屢照波明鏡繫下餘生惜斷琴
入谷遷喬分頃刻不知何處聽冤禽

四

卷帙齊堆插架中區分高下認西東
闔黎舊記籠紗碧軋苗新添勒帛紅儘費推排殊苦事
尙多屈抑肯言功塵埃物色非容易慙愧驪黃冀北空

晦夕臥病

倦極轉難寐孤燈尙半明殘星時漏隙寂夜但傳更短
榻嫌衾冷疏窗覺紙鳴鼻端參靜息微帶藥香清

贈朱槐卿司馬

升吉

河魚苦腹疾食乃不撤蠶久之火性炎齦齶先受殃豈
惟齒牙動亦復脣舌僵每飯不下咽朝暮聊飲湯朱家
古之俠過視殊彷徨勸我屏勞勸息偃宜在牀几案未

了事厭苦心手忙不待將伯呼一一皆周詳八家本同
并此界無爾疆出入相友助於古原尋常奈何江河流
日日趨下方安得君數輩協力支隄防我則空萬慮置
身華胥鄉靜驗太和氣調劑陰與陽依舊百體安飽飫
酬飢腸思君悱惻衷銘鏡毋相忘

填榜日作

登場校射侯懸中萬六千士爭彎弓失鵠者退得者進
百中之一稱豪雄華堂沈沈席三嚮羣官列坐中西東
重行左右北爲上環而伺者摩肩胸吏據南案執筆侍
使者手折糊名封標簽一一認徵記朱本墨本相符同

長箋三尺闊三寸姓名籍貫書精工傳觀旣周乃填榜
撫部逐次親題紅王前盧後判高下豈藉韓陸交關通
時維九月日辛巳微雨灑道天冥濛堂前森列八巨燭
粗如人臂光熊熊羣官少休具餐飲屢飫醉飽多懽悰
僕夫撤筵吏重寫解頭一唱收全功洪鑪轉運大匠力
良鏹精鐵歸陶鎔黃河滾滾自天下纖鱗巨鬚都成龍
羣官起立各相揖行者送者儀肅雍轅門鳴礮健兒奮
護榜而出聲殷隆想當節署三日挂傾城觀覽行憧憧
我輩襄校幸終事敢詡衡鑑皆平空惟持此心表精白
百靈陰察無私衷諸君得失勿悲喜學貴立命奚亨窮

送王松溪刺史攝廬陵

舊識廬陵縣名區實壯哉同參圖史筆獨展簿書才郵
路征帆速臺司急檄催恩惠江上別不及一銜杯

賀定夫同年靖南轉饗北行至茌平暴卒哀之以

詩得二十四韻

黃流東北趨河運已非故轉饗從陸行輿擔按程路君
入東平州改道遂貽誤州隸私傭錢舍車問津渡風起
船忽傾篙師力難助囊金什損一滅水滅成數僕死君
亦危趣向濟南訴齊東諸長官睡諉兩枝搭補救鮮良
方傾家亦無措姑復往北征且行且停駐我想君斯時

昏昏墮塵霧萬感攢一心星礙兼恐怖夜臥不貼席朝
餐每投箸躑躅官道中何由得生趣兩驛過莊平墜馬
頓僵仆喚之不肯醒魄在魂已去嗚呼君生平樸愿更
猶豫驟際憂患途焦灼向誰語早知非吉耗今果得君
訃安用妄猜疑謂君飲毒蠱辛苦成一名年華歎遲暮
況以薄命軀中道阨難遇朔氣天冥冥風雪正寒沴君
魂儻歸來悽慘楚江樹

閨詞

獨倚湘簾下春風拂鬢斜自矜容絕代不借一枝花

送王少嚴觀察

延長

攝守南安

西道稱巖郡邊氓望守臣庾梅先有信爲報滿山春

六一山房續集卷六

六一山房續集卷七

庚辰

鄧 董 沛 覺軒

庚辰

汪柳門學使

鳴鑾

招同李芋仙刺史張公東明府

奉陪賀雲甫尙書

壽慈

宴署齋

雲水高懸一鏡澂猶從法座溯傳燈

學使出尙書門下

瓶龕清

供花無恙庭院微寒酒可勝良會徧邀佳客至放談幾忘下官稱纖鱗自笑池中物尙許龍門取次登

二

檐樹參差黛色深晚來官閣更沈沈天教積雨生涼意

人坐春風得好音萍水關山才子序江湖廊廟老臣心
頻年怕聽伊州曲願寄無紋太古琴

越日賀尙書招集南昌郡齋

公子良楨時守郡

料檢還鄉集今來近里門湖山皆地主泉石亦

天恩下士南州榻留賓北海樽祇談風月好世事莫重

論

二

就養衙齋日江春換舊年論文頻侍座燒燭此開筵甲

乙評書格

是夕觀所藏法帖

庚申證道註

尚書習養生家言

知公歸未

得陽羨本無田

柳門同年奉諱東歸唁送江舟漁焉賦別

今日何日送君章江門章江之水清且淪東風始來江
花已春遊者熙熙馳馬郊闥胡我與君相對而酸辛君
之泣矣君悲老親我之涕矣我送故人一解憶君之來
舊歲八月以文字役同處四十日君爲琴我其瑟君爲
膠我其漆皇皇

天子命重畀君學使節謂可三年乃始與君別二解豫
章文物區今漸不如古期君一振之歷歷示門戶文有
班揚經有鄭許庶幾得人以酬

聖主韶車勞勞不遑將父三解奈何哉白日西逝黃河

東流茫茫天地中有獨憂訃音千里來蘇州養不得迎
醫不得瘳君次豐城亟焉返舟但見岸樹沙草一一變
色皆成秋出門三日還泊章江頭四解江風淒淒朝懸

靈旗浙浙江雨夜聽津鼓君不入城但聞哭聲素車白

馬江干弔者東歸有期送君於滕王閣下五解君之歸

也將啟母坐卜吉合葬需我志銘依依聚首恩恩啟行

行者送者各各難爲情情之蘊結慘不能說謂可三年

乃以半年別六解身有別離情無絕期送君之歸再見

不知何時黃河自東白日自西鳴鉦喤喤風帆四馳行

不可留相對鬱噫君心我心江水知

七解

題湯貞愍 賴汾
畫像

金陵王氣收地道火雷震將軍雖寄公

貞愍常州人

一死亦

臣分狂寇自西來千里無堅陣大帥昏不知獻策且遭

擯

貞愍上攻守十二策總督陸建瀛不省

義旅空結屯疲卒半投刃眼看

孤城危誓願以身殉茫茫獅窟中

貞愍別墅在金陵城北曰獅子窟亦作詩

窟圖籍共灰燼闔門投魚池清流當埋殯憶在承平時
儒將寓名郡南朝好江山風雅寫遺韻節彼龍門開從

遊得才俊誰稱都講生高弟有文進死別踰十年無由

哭靈櫬敬爇一瓣香追摹舊鬚鬢

像爲君雲所追摹

畫筆

師所傳神注貌相印能起觀者心瞻仰斗山峻將軍年

古稀海內播聲聞三世皆國殤

祖父殉節臺灣

風雨泣殘燐自

有真氣存丹赤在方寸上受

天子袞泉下復奚恨昔讀將軍詩

烟水蘸餘潤詩集已刊行

今觀將軍像身死氣猶奮再拜書贊辭用以表忠蓋同此沈淵悲大招續天問

送彭芍亭先生

祖賢擢撫湖北

西道旬宣地春風十四州

帝頒新使節民動去思謳瑞應黃公粟懽聲白傅裘昆連吳楚界和氣總周流

二

海內稱名閥

天心眷注隆相門韋杜表京尹趙張風澤國隄防亟鄰
災軫恤同虛懷咨利病洞達八窗中

三

近想籌邊策紛紛議戰和審幾宜早決論力豈同科海
舶乘流便江城扼要多上游天塹險未雨待如何

四

兩載趨鈴閣深蒙哲匠知薄才羞自薦大器遠相期良
吏求儒飾飢嬰戀母慈望窮千里目江上送旌麾

讀左氏傳

成康二百年倏已遷東周秦晉齊楚霸四面皆強侯淫
名始徐偃蠻服羣效尤蠢爾赤白狄競肆蠻食謀伊川
被髮祭腹地多耗喪滅溫執凡伯遂貽王室憂姬宗夾
輔勳所恃單與劉誰顧弱小邦亟亟封楚邱公卿聘列
國使車亦綱繆天子宴陪臣享禮加寵優恩多益驕抗
轉眼遽尋讎陽樊歸盟主南扼黃河流憶昔都洛時包
茅輸荊州王祭既不供問鼎將奚求關西養馬俗邊思
接渠接桃林失其險投隙來戎酋假言恤鄰難盡奪財
田牛旣掌北門管乃置東道郵况茲滄海路開自徐承
舟夫差一作偁江漢同浮浮安得鄭僑辭命彼行人修

安得終甥戈春彼僑如喉裏宏血化碧隱憾留千秋尼
山思斧柯此願何日酬

次和鄭伯庸司馬贈作

從來將軍負此腹道路奔馳車輶輶眼底不識豪右門
一笑青樓監牢麴荏苒五十鬚眉蒼瑣瑣卑官下除目
刺舟遠別三神山委轡塵中復登陸豫章大木古知名
鶴鵠一枝借棲宿江天晴少雨日多偃臥匡牀看檐瀑
夢寐憶我滎陽生詩筆清華藥甜熟遺山梅郎揖讓閒
楮墨縱橫花滿屋東南作者誰著聲我鼓子旗兩相逐
塵容淨洗三斗俗勞我形神無案牘酬詩絡繹送詩忙

才子房集卷之三

僕者聞呼愁繭足

原作

歙縣鄭由熙伯庸

董侯前身郝隆腹萬卷撐腸飢轆轤又如東坡飲文字詩書釀作糟邱沈浸釀郁供咀含上下千年電光目偶然擊節狂歌詩平揖高岑陋楊陸持論不與人同科法諦禪宗悟歸宿君家浙東好山水卻愛匡廬看飛瀑去年邂逅章江濱驚此容顏夢中熟買鄰不費季雅錢東頭西頭兩家屋我願爲雲子爲龍驥斬名場快馳逐平生作吏苦不俗拚燒几案三千牘躊躇問君君弗言走向江流濯雙足

旅感

憔悴風塵兩載過
章門旅思奈愁何
官街盡日雞豚散
高屋逢春燕雀多
囊粟空憐飢曼倩
鑪香閒對病維摩
同曹屈指除書近
彈鋏歸來未肯歌

二

舊交懷牒半登程
送客勞勞郭外亭
南浦有情春草碧
西山無恙暮煙青
三生未了遊塵想
七寶還資度厄經
聞說諸天多幻化
幾從變相悟眞形

三

寥落燕臺舊酒壚
休將名勝話洪都
仙人狡猾龍蛇劍

帝子風流蛟螭圖香火前緣丹竈冷江山餘夢彩毫枯
玉關西望思投筆慙愧乾坤一腐儒

四

文史由來卜祝閒更嗟貧女嫁衣單當場酒薄恆逢魯
諛墓金銷尙愧韓僮僕安眠投刺少親朋遠訊答書難
漫言食肉無窮骨依舊青虧況味寒

和作

忠州李士棻芋仙

昨宵人送好詩過對客長吟喚奈何似此通才前輩
少最憐同病後來多豪門結納琴先碎世路恩仇劍
屬摩挲落江城行老矣每逢青眼一高歌

二

蜀道天西遠作程舊時頻訪子雲亭來浮彭蠡千帆
白夢繞峨嵋萬笏青鐵柱仙人何日遇金繩梵塔偶
然經遨遊擬徧中華迹畫手先圖五嶽形

三

停車不復過黃爐十載青春憶上都易水衣冠豪士
賦燕臺花月美人圖無方縮地前塵冷有恨離天老
淚枯遺興且須觀海市未應牖下伴癯儒

四

流浪迴黃轉綠閒有時顧影自嫌單荊州肯識階前

李楚國誰驚袴下韓炎日正長清睡足故山何處隱
居難洞天儻割寬閒地願約松筠耐歲寒

將進酒

於穆聖皇大開明堂公卿百僚左右蹕蹕耰鋤在野詩
書在庠橐弓戢干歸馬華山陽福德御宇黎民壽康行
者萬里不齋斗糧日重輪月重光太史書雲物祥西指
虞淵東扶桑欽奉正朔稽首頌天可汗千萬歲無疆臣
謹北面再拜進陛下觴

贈韓生

韓生皎皎玉爲骨楚曲秦腔中音律豪門鞠部早知名

生爲李提督
世忠家伶

不作春鶯作秋鶴繡旗四展風拂拂女軍

對捧將軍出英雄兒女兼一身譙國平陽古人傑明光
細鎧紅綃帕錦袖迴翔臂如雪雪花飛上瓊林枝纖歌
始凝白雲遏忽然兩陣勢交突鼓聲驟起金聲咽有若
駿馬登臺馳鞭影刀鋒電光掣低腰貼地故盤折香汗
交頤粉融滑翻身倒立雙趺翹窄窄弓鞋換羅襪橫波
一轉神爲奪叔寶當筵防看殺斯時百輩觀者心半入
癡頑半饑渴蓬萊縹渺舊宮闕燕部陳張兩奇絕意中
南北較低昂技差勝汝貌非匹韓生西來纔數月未肯
羞顏向人熱漫山桃李爭豔姿別有孤花自芳潔江城

二十一
風雨落梅節酒酣爲爾感詩筆才色徒供豪貴憐聲名
已被同曹嫉自來巧者不如拙悔抱朱華餌容悅天涯
羈客如爾儕一例彈詞賣歌活

病中寄家書

窗戶沈沈晝不開地多林氣易生災良方細檢長沙帙
遠向明山採藥來仲景以鼈甲煎丸爲三陰瘧主
治方吾鄉有之此間絕不可得

二

欹斜淡墨數行書元亮中年痞未除郵到家門還寄語
女兒同病近何如

雜言示張公束

鹵莽而耕積穀百斛辛苦力田終歲仰屋

二

東山放牛西山牧羊驥馬在廐圉人減糧

三

歸妹愆期女大自悲三年育蠶三年織衣

四

雷雨變化自彼龍門水族無簿焉知加恩

五

初印摩挲姁姁日惠有功必候我思劉季

六

立乎定哀傳聞異辭華袞之例游夏不知

得沈芸閣太守姑孰書卻寄

不見沈生久今年兩得書風霜憐故態明好問新除僕
病身無恙君才更有餘一登元禮座聲價定何如

蕭教

君方膺李

之薦

二

天塹橫千里鄰封地勢參唐分江左右明倚海東南形
勝宜全攬韜鈴幾熟諳蕪湖原重鎮早選戶三男

趙孝子詩

趙孝子會稽人名萬全父應麟生少家苦貧父不得志

惆悵而出門

一解

出門三千里北渡黃水崇禎末年羣盜起荆棘山河老弱轉徙莽莽墟壘大半新鬼嗟爾異

鄉人寒索衣飢索米躡躅兵聞曷所棲止吁嗟乎趙君竟以客死

二解

父出門子二齡疇鞠育母氏丁越十七

載兒長成戴天履地不知所生再拜辭阿母執手交涕

零母弗念兒遠征母弗悲兒隻形兒願尋阿父東西南北無定期某月某日孝子遂啟行

三解

溯江淮浮汴泗

歷周秦到燕代鄉貫暨姓名書牘負之背路不間險夷時不辨明晦夜臥與鬼鄰朝朝咽糠稗迤邐經過馬邑地天相孝子乃遇張文義

四解

文義告孝子爾來尋爾

翁爾翁不得志生死吾家中我牀我几我棺我槨一一

全始終有木蔥蔥有草蓬蓬斯爾父之幽宮

五解聞斯

言淚如涌尋葬所發其冢雙螭翩何來飛投孝子懷飛

飛相上下疑是父魂化生不能見父身刺血驗骨始知

天性親

六解

乃識乃藏乃橐乃囊踰井陁下大行陸走

司充水達徐揚不畏蛟與龍不畏豺與狼天相孝子安

穩負骨還家鄉

七解

卜吉壤安遺魄母終天祐於側

天子旌門闈以爲里黨式子孫世世食其德南鎮巍然

孝子宅

八解

蔡劍白郎中歿於漚上別墅寄挽以詩

江津送我暮雲天詩酒曾無再見緣遷客王逢纔卜宅
修文李賀竟齊年歡場賓從隨金散高閣圖書望子賢
猶記故人臨別贈鄉關回首益悽然

二

三春閨盡舊繁華年少青驄倦看花徵逐詞壇吳越客
收藏墨本宋元家遺編空著歐陽錄遠道難馳范式車
蕭颯西風鴻雁路孤寒一例叫天涯

續言再示公束

嬖人沮君君子俟命今日上吉萬戶爲令

二

自公顛倒侯此大邦屠門割肉眈眈吠尨

三

乞援淮楚皇肯夙駕將軍飛來從天而下

四

周道倭遲尼彼車牽老子啟闢化胡爲佛

五

斗醉石醉胡我獨醒騏驥聯翩胡我獨行

六

我占同人先咷後笑捧檄訴訟張仲之孝

李芋仙刺史將作遠游賦此贈別

李君讀書不得意來作江城升斗吏未肯齷齪媚上官
區區姓名挂彈事終朝褫職身手空圖書典賣難救窮
豫章同僚半相識誰能援汝頭白翁湘鄉節帥舊戎幕
門下諸生多顯爵君亦著錄高座中十載離羣竟落落
側身俯仰天地寬不如傳客公卿閒公卿袞袞列朝籍
君所知者疇最賢風塵半生年已老收拾行囊贖詩草
願持手板謁軍門長揖登堂問安好北走燕塞南走吳
東溟日出孤帆孤金銀宮闕想非遠會當一採驪龍珠
丈夫困守實無計苦殉狂名累身世平原孟嘗何代人
我欲從之作輿隸君今行矣弗復憂鄱湖首驛南風舟

出門有功涉川利自此江海無逆流

許周生駕部宗彥玉印詩爲其哲孫季仁太守善

長作

我讀鑑水集拳拳殊服膺鴻富包眾有論學持其平斟
酌漢宋閒勿啟水火爭下視山膏流相去判蓮檻先生
不可作無由侍門庭流傳此玉印亦動思古情此印誰
所造千載光熒熒先生往省父得之滇南行方圍準漢
尺約可四寸贏昆刀篆兩字平列曰周生先生愛不釋
寶若彝鼎銘爲之更舊字先生本字積卿借彼前人靈藏書甘
萬卷卷端識分明翰墨布天下鈐尾當題名危失旋危

得似有神物憑歌詠誌欣賞毋負金石盟後來遺兵燹
狂寇竄杭城垣宅已焦土圖籍皆飄零文孫保此印太
璞猶完貞先人手口澤世世同遭經濟宿觀趙璧宴享
誇楚珩我見在豫章一豁雙目睛深宵耿奇彩上燭牛
斗星或恐張雷徒疑作干鎮精

奉懷季仁太守信州

卅載西江旅夢孤園林回首半荒蕪謝家潭壑皆先澤
苦憶杭州寫畫圖太守有碧聲吟館圖其先祖讀書處也

二

故鄉纔隔草坪關東指西湖別後山應有閒愁消不得

侍兒低唱大刀環

三

香祖文章託美人風流儒雅見天真君看弋水屏山路
徧作陽和萬戶春

紀夢

瓊漿渴飲驪龍醉九原丈人弄狡獪蓬萊弱水不可求
長橋縮作虹蜺帶樓臺百尺飛檐影美人手捲珍珠簾
迷離惝恍半迎卻似嫌俗子鬚鬟鬚題詩一笑出門去
蛟蜃翻空幻煙霧黃泉碧落兩茫茫約記華胥有來路
路逢道者頭鬚髮掣我瞬息歸四明此豈山中偃月子

或是海島安期生

行清江事自奉檄至視篆作

嚮夕客投刺歡笑揖我庭自公有召命將作清江行官書急星火三宿期登程資裝百無措受寵翻若驚張燈趣輿轎叩戶招友朋病起未匝月永夜殊不勝尙聞此劇縣今歲頗豐盈庶解中心憂弗憚勞瘁形

二

翌旦辭節轍以次謁使守諄諄催戒途皇敢少遲留攝官非眞除於古稱板授諒可一載期權縮半道緩同好書百函紛紛薦親舊上者司計臣下以備奔走斟酌辭

受閒裁答費營構假寐稍息神更盡不知漏

三

東市買旗葢西市買篋囊奴手四百指一一皆憇忙餐
飲甫到口客至須迎將前去後相踵強忍飢渴腸殷勤
話衷曲絡繹饋酒漿大官亦躬送禮數逾尋常故事藩
親送諸事悉嚴辦滿屋羅行裝寓舍歷有年戀別如故鄉

四

黎明開江舟揚帆出津渡高秋東北風人力以天助傍
晚過豐城初更抵樟樹卻借圓月光呼船邁前路淺狹
加緯夫猛進不容住一日二百里舟子詫奇遇倚枕姑

暫眠瞬息屢驚寤迄到臨江城朝陽豁林霧

五

入城參府公假館在試邸受印屆吉時稽拜有常禮傳呼聲引喤南面肅官體手判朱墨條臨政從此始縣長古徹侯州郭況相倚法律通諸經循良驗前史清江清不汚治本貴求已願復銘盥盤鑑此一泓水

清江雜詩

東漢初開縣南唐始定名至今分楚界自昔號吳平野曠風搖屋洲高水貼城近傳諸令長幾輩有賢聲

二

三載經兵火城居萬戶凋晨炊煙斷續秋氣樹蕭條大
市魚蝦賤頽牆鼠雀騎坐談生聚策耿耿起中宵

三

地本當衝要蕭灘驛道長來江稱上險踰嶺入南荒鄰
饑催綱健軍書遞站忙况聞緣海警徵調到湖湘

四

澤國多窪下焦心視事初一編行水鑑千古活人書呼
籲籌隄岸漂流軫室廬此邦敦本計鄭重待何如

湘軍過縣將東戌吾郡送之以詩

旄頭夜射海東雲肅肅戈旛兩隊分慙愧州民新作宰

更無牛酒勞諸軍

二

江南公覆舊知名持節重開浹口營

湘軍兩營以前浙帥黃少春統領

當代不需婁敬策儘教飛將守邊城

楊忠節公祠

生不負總理臣死不負偏安主賈莊不死死贛州一死
完名萬萬古嗚呼公本清江人少談經濟才軼倫南州
一士信奇特文山止水皆前身宏光出狩隆武起嶺北
長城屹然峙恢復鄉郡稍有功轉眼天戈復南指重圍
半載孤支撐蠻土水陸招援兵行朝告變士氣索巨礮

烈烈全城崩全城崩楊公死死百年身廟祀魄在鄰州
魂在此素車白馬乘風歸絕勝錦衣還故里
興朝天子褒忠貞北范南史同易名鄉賢祠宇例防護
我當手勒豐碑銘

樟樹鎮

南贛西袁兩水交舊開一鎮俯江坳長仙雷火驅神木
儒將旌旗指逆巢賈舶屯車齊轉運麥田蘆渚半肥燒
循行自愧甘棠舍信宿旬留此樂郊

長山道中口號

山在縣東鄉

路入山邨一例平溪潭徹底水澄清西來未敢稱生佛

翻笑兒童合掌迎

輿過諸邨兒童膜拜道左亦可笑也

喜雪

秋來苦焦旱不雨已十旬一陽生大冬和煦如初春芸
黃徧郊野山木皆枯薪僭豫敢辭咎宵旦憂心焚齋宿
具圭幣宛委訴明神願鑒疲瘠區上乞荃宰恩昨夜風
北來漠漠天同雲祥霧自空降花雨灑纘紛高積三尺
餘莫辨凹凸痕江波混一色四望真無垠萬彙有蘇意
氣象殊更新料彼邨農家歡笑洽比鄰我亦召賓佐雜
然肴蔌陳開樽豁清賞坐覺爐火溫豐年此嘉兆珠玉
奚足珍有事告春及庶慰田功勤

調洪文卿學使鉤舟中

晴雪彌空闊衝寒夜泊船行旌新使急致餼小侯虞夾
袋才名富班衣綵色鮮遄歸斬上壽爲我暫綠延

閩中洲安豐隄

曉過清波渡平疇縱目觀江形雙股束隈勢四圍寬隙
土彌縫易疲氓振起難涓涓宜早塞旣倒卽狂瀾

六一山房續集卷七